

四庫全書

集部

欽定四庫全書

劍南詩藁卷三十九

宋 陸游 撰

戲贈園中花

橫風疾雨為花厄
霽日暄風又不禁
我欲小施調燮手
酌中寒暖半晴陰

春思

兀兀治聲酒未醒
霏霏潑火雨初晴
愁看入戶桃花片

閒聽爭巢燕子聲百疾侵陵成老大一春轉盼又清明
蘭亭禹廟渾如昨回首兒時似隔生

贈燕

燕來我何喜感此中春時燕去亦何有無奈週年悲四
序如循環萬物更盛衰我亦寓斯世如客會當歸驪車
已在門戀戀終何為達人付無心欣厭兩俱非豈有天
壤間會合無別離對花不爛醉燕子笑汝癡

雨悶示兒子

東吳春雨多略無三日晴濛濛平野暗浙浙空階聲百
花雨中盡三月未聞鶯重裘坐與室時序真強名亦欲
借驢出泥淖沾衣纓撫事每累欬濁醪聊獨傾景運今
方開關輔一日平我家本好疇灞澹可躬耕買酒新豐
市看花下杜城會當與汝輩藉草作清明

讀晉書

諸公日飫萬錢厨人乳蒸豚玉食無誰信秋風雒城裏
有人歸棹為尊鱸

春晚苦雨

垂老卧村墅餘寒欺病身雞猶未忘旦雨欲不容春忽
忽花時過茫茫草色勻尊絲已上市一飯未傷貧

燕

春晝花明映柳纖燕歸勝事始能兼爭梁評語驚幽夢
掠地斜飛避畫簾雛食得蟲應自喜巢泥經雨更頻添
去來要是知時節常怪人嘲作附炎

夜雨

空階雨聲夜轉急壁疎窗破淒風入一燈嫋嫋吹欲滅
老生獨傍書架立取書欲讀輒復休却行出門搔白頭
市樓賣酒日千斛衆人皆樂君胡憂

寒食日九里平水道中

曉雨絲絲熟食時泥深轍斷客行遲亂雲重疊藏山寺
野水縱橫入稻陂馬鬣松陰封舊隴龜趺道左立新碑
扶衰此出知能幾清淚臨風不自持

春晴自雲門歸三山

乍行春野眼增明漸減春衣體倍輕人賣山茶先穀雨
鴉隨幡祭過清明柳塘水滿雙鳬戲稻隴泥深一犢行
晚到三橋泛舟去掩關不復畏重城

予數年不至城府丁巳火後今始見之

陳迹關心已自悲劫灰滿眼更增欷山川壯麗昔無敵
城郭蕭條今已非宰堵招提俱昨夢祝融回祿尚餘威
故交減盡新知少縱保桑榆誰與歸

晚自北港泛舟還家

舒嘯蓬籠底經行略約西水深鵝唼艸雨細犢掀泥醉
倚乾坤大閑知物我齊衡門觸冠過聊得賦幽棲

書懷

羸馬常愁趁早朝斥歸幸復侶漁樵青黃未勝溝中斷
宮徵何殊爨下焦心樂簞瓢同鼎食身安山澤謝弓招
數間茅屋誰知處煙雨濛濛隔斷橋

初夏

淡靄輕颼入夏初一窗新綠鳥相呼出門易倦常歸卧

著句難工但自娛花徑蝶閒無墮藥酒樓人散有空壚
閩川茶竈猶霑及肺渴朝來頓欲蘇

閩中貢餘
茶初至

小築

放翁小築寄江郊屋破隨時旋補茅算看白煙橫水際
曉聽清露滴林梢生來不啜猩猩酒老去那營燕燕巢
目斷鹿門三太息龐公千載可論交

喜雨

幽人睡覺夜未央四簷懸溜聲浪浪樂哉甘澍及時至

九衢一洗塵沙黃明朝鄰曲各驩喜
賽廟沽酒割猪羊
不勞輾轉蹋龍骨轉盼白水盈陂塘
呼兒掃地設管席
與汝一醉歌時康
豈惟磨鎌待收麥
小甌已覺吳粳香

晨起

天公擇地養衰殘著向桑村麥野間
曉色入簾初滉漾
幽禽窺戶已間關
酒徒散去稀中聖
詩思衰來媿小山
一炷沉煙北窗底
曲肱卧看不勝閒

五月初病體益輕偶書

世事紛紛了不知又逢燕乳麥秋時經年謝客常因醉
三日無詩自怪衰乘雨旋移西崦藥留燈重覆北窗棋
但將生死俱拈起造物從來是小兒

己未重五

時已
請老

門楣束艾作神人團糴盤中節物新安用丹書穰赤口
風波雖惡不關身

五月七日拜致仕勅口號

剡曲東歸日醉眠冰衙屢忝武夷仙恩如長假容居里

官似分司不限年一扎疏榮馳底置兩兒扶拜望雲天
坐糜半俸猶多媿月費公朝二萬錢

又

黃紙東來墨未乾孤臣恩許挂朝冠小兒扶出迎門拜
隣舍相呼擁路觀白首奉身歸畎畝清霄無夢接鷓鴣
從今剩把花前酒憂患都空量自寬

致仕後即事

休官拜命不勝榮墨溼黃新照眼明絡繹交親來作賀

腔羊酒擔擁柴荆

又

救過鸞臺鳳閣來
清晨初拆驛書開
繡箱香案迎門拜
身著朝衫止此回

又

山村處處晴收麥
鄰曲家家午曬絲
正用此時身得謝
十分壽酒不須辭

又

白髮三朝執戟郎
賜骸偶值歲豐穰
村東已種千畦麥
舍北新添百本桑

又

老民一日脫朝衣
回首平生萬事非
赤腳婢沽村釀去
平頭奴馭艸驢歸

又

一生病鶴寄樊籠
此去鴻冥萬里空
未論尊羹與羊酪
新杭要勝太倉紅

又

沉緜分已餞餘生造物苛留未遣行今日下牀還健在

一編來就小窗明

又

清靜全勝欲界天逍遙不減地行仙衆中莫怪人嫌老
十五年前本命年

又

一盂麥飯掩柴關坐久不堪腰脚頑拖得瘦藤間信步

小橋東北望螺山

又

問門前客元無迹
諛墓中人本不工
猶有隣僧能送米
未妨竊比玉川公

又

歸耕所願雜民編
乍脫朝衫喜欲顛
但得吾兒能力穡
不請半俸更超然

又

湘湖蓴菜勝羊酪
項里楊梅敵荔枝
八帙開來今過半
一杯引滿若為辭

又

不嫌雞瘦濁醪酸
艸艸杯盤具亦難
食指忽搖方竊喜
小兒來請賽鄱官

又

甌中白飯出新春
瓮裏黃齏細茱萸
一飽坐兼南北美
始知造物念衰翁

又

多事車前要八騶老人惟與一藤遊未教變化為龍去
更踏人間萬里秋

讀後漢書

賃春老子吾所慕垂世文章寧在多詩不刪來二千載
世間惟有五噫歌

又

季英行年九十八猶灌園蔬授六經我欲圖之置齋壁

世無顧陸善丹青

新裁道帽示帽工

故帽提攜二十霜別裁要作退居裝
山人手段雖難及老子頭圍未易量
花插露霑那暇惜塵侵鼠齧却須防
裏時嬾復呼兒問一匣菱花每在傍

新製道衣示衣工

良工刀尺製黃絕天遣家居樂聖時
著上朱門應不稱裁成烏帽恰相宜
客撐小艇招垂釣僧掃虛窗約對棋

寶帶貂冠雖看好定知不入野人詩

兩翁歌

君不見塞上失馬翁馬去安知不為福又不見新豐折
臂翁臂廢身全老鄉國陸翁多難類兩翁著書滿屋身
愈窮十年力耕遇水旱老不能耕年始豐人言翁窮可
閔笑霍食鵠衣天所料翁方自謂實幸民對人抱膝惟
清嘯即今羣公佐明主長劔挂頤來接武向非老病又
不才縱欲歸休寧見許

五月中連夕風雨氣候如高秋枕上有賦

擁被微吟短鬢秋孤燈殘漏共悠悠雨聲不貸三更夢
酒力寧禁萬里愁身寄湖山鄰剡曲心遊河嶽過關頭
世間可恨知多少虛弊當年季子裘

前詩感慨頗深猶吾前日之言也明日讀而悔之
乃復作此然亦未能超然物外也

身世今如一老僧病餘殘髮雪鬢鬢湖桑埭下漁舟雨
道樹山前野店燈澗水潺湲供洗鉢松風蕭颯入行滕

世人欲覓何由得覩面相逢喚不應

雨後過近村

賦罷淵明歸去來紵衣桐帽一時裁
歲華新筍初成竹天氣停雲未斷梅
江路醉歸常嵬峩僧窗閑過即徘徊
老人剩有周年感寄語城笳莫苦催

銘座

天下本無事庸人實擾之吾身本無患
衛養在得宜一毫不加謹百疾所由滋
人生快意事噬臍莫能追汝顧

不少忍殺身常在斯深居勿妄動一動當百思每食視
本草此意未可嗤賦詩置座右終身作元龜

致仕後述懷

彈冠紹興末解組慶元中灩澦危塗過邯鄲幻境空閑
傳相牛法醉扶鬪雞翁衝雨歸來晚山花滿笠紅

又

壯歲江湖去還朝六十餘輩流俱已盡勲業固知疎遽
走寧黔突長閒祇荷鋤如今更何憾終作愛吾廬

又

生理雖貧甚胸中頗浩然常辭問字酒屢却作碑錢寧
有駱堪鬻尚無車可懸小須梅雨霽散髮醉江天

又

昔自臺郎斥頻年困負薪四叨優老祿十送故鄉春衰
瘁寧知活蕭條敢厭貧惟思逢樂歲擊壤學堯民

又

韋布還初服蓬蒿卧故廬所慚猶火食更恨未巢居叱

叱驅黃犢行行跨白驢交親各強健不必問何如

又

店店容賒酒家家可乞漿白陂時雨足綠樹午陰涼病
為休官減門緣謝客荒今朝遇隣叟滿意說豐穰

蝶

庭下幽花取次香飛飛小蝶占年光幽人為爾憑窗久
可愛深黃愛淺黃

戲贈酒榼

老去卧湖海白髮朝朝新
賴有小道士時來中聖人
形模雖簡古風味絕清真
何當秋雨夕傾倒見情親

題菴壁

破屋颼颼雀鼠穿邇來四壁愈蕭然
錢多孰謂可使鬼人衆何嘗能勝天
禿尾驢遊雲外寺長鬚奴引竹間泉
更餘一事猶當勉讀易從今十絕編

又

孤村寂寂潮生浦小院昏昏雨送梅
蔬食一簞宜面槁

畏塗九折自心灰
古人骨朽有書在
今雨泥多無客來
散髮陽狂非寄傲
世間萬事本悠哉

泛舟澤中夜歸

無窮煙海接空濛
秦望稽山醉眼中
虹斷已收千嶂雨
鶴歸正駕九天風
漁舟容與橫沙際
水鳥號鳴傍葦叢
興盡還家忽三鼓
半輪殘月斗杓東

書嬾

此身不覺老侵尋
殘髮蕭蕭雪滿簪
那有新詩書觸目

亦無閒話問安心寒垣西戍茫如夢省戶東歸病至今
一嬾便知生世了午窗酣枕敵千金

晨起

清晨推枕起盥面吾事足豈無掃灑役出市待歸僕小
飧亦已省尚進藥盈掬整衣登北堂危坐巾一幅徐行
梧楸陰愛此雨餘綠幽鳥東山來鏘鳴若琴筑靜聽興
未闌穉子報飯熟欣然往從之寧計食不肉

夜坐

仲夏苦鬱蒸既夕熱未解浴罷坐柴門汲井痛掃灑覆
野天穹穹垂地星磊磊明河落無聲北斗低飲海三更
缺月升艸木盡光彩漁舟在何許斷續聞欸乃百憂集
老境坐歎雙鬢改誰能擁雕戈遺敵何足醢

白樂天詩云倦倚繡牀愁不動緩垂綠帶髻鬟低
遼陽春盡無消息夜合花前日又西好事者畫
為倦繡圖此花以五六月開山中多于茨棘人
殊不貴之為賦小詩以寄感歎

王室東遷歲月賒
兩京漠漠暗風沙
繡牀倦倚人何在
風雨漫山夜合花

蜉蝣行

蜉蝣至細能知時
春風磴雨占無遺
蜻蜓滿空乃不知
庭除一出無歸期
樂哉蜻蜓高下飛
蜉蝣未盡何憂飢
簷間蜘蛛亦伺汝
吐絲織網腹如鼓

望霽

夜雨勿厭空堦聲
天公欲作明朝晴
明朝甲子最畏雨

榜舟入市聞古語今年雨暘俱及時麥已入倉雲四垂
雨來不駛亦不遲大點如菽細如絲徐徐雲開見杲日
晚禾吹花早禾實但令有米送官倉豆飯藜羹甘似蜜
久雨路斷朋舊有相過者皆不能進

今年風雨多平陸成沮洳吾廬地尤下積水環百步客
從城市來熟視却復去僮奴笑欲倒織屐知無路計其
各還家對竈燎衣袴嗟予久退藏蓬藿生庭戶誰如數
子賢裹飯肯來顧清言雖不接亦足慰遲暮

散步至三家村

湖桑埭
西村名

人情簡朴古風存
暮過三家水際村
見說終年常閉戶
仍聞累世自通婚
罾船歸處魚殮美
社瓮香時黍酒渾
記取放翁扶杖處
渚蒲煙艸溼黃昏

村東晚眺

興來信步過東陂
最愛村東物象奇
藤杖穿雲秋望處
葛衣霑露夜歸時
殘聲淒斷蟬移樹
孤影荒寒鵲遶枝
自揣今年還得飽
一川新稻已離離

又

飽食無營過暮年
筇枝到處一蕭然
清秋欲近露霑州
新月未高星滿天
遠火微茫沽酒市
叢蒲窸窣釣魚船
哦詩每恨工夫少
又廢西牕半夜眠

露坐

星稀避月明河白
映天青入夜蟬逾急
先秋葉自零
花枝栖露蝶簾罅
度風螢欲喚隣翁坐
漁舟醉不醒

又

落月無留照殘河亦已傾
墜枝雙鵲裊黏艸一螢明
暑令忘三伏涼颼逼五更
為憐荷瀉露故起繞池行

致仕後歲事有望欣然賦詩

聖時恩厚賜餘生日與鄉閭樂太平
已棄胡牀無長物尚攜拄杖有同行
新裁烏帽人爭看小摘青蔬手自烹
買得水車無用處絕知造物相歸耕

夜聞姑惡

湖橋東西斜月明高城漏鼓傳三更
釣船夜過掠沙際

蒲葦蕭蕭姑惡聲湖橋南北煙雨昏兩岸人家早閉門
不知姑惡何所恨時時一聲能斷魂天地大矣汝至微
滄波本自無危機秋菰有米亦可飽哀哀如此將安歸

村舍雜書

我本杞菊家桑苧亦吾宗種菰日成列喜過萬戶封今
年夏雨足不復憂螟蟲歸耕殆有相所願天輒從

又

中春農在野蠶事亦隨作手種臨安青

桑名可飼蠶百箔

累累繭滿簇繹繹絲上篋老子雖安眠衣帛可無忤

又

舍北作蔬圃敢辭灌溉勞輪囷瓜瓠熟珍愛敵豚羔晨
飧戒厨人全頂淨去毛雖云發客笑亦足慰老饕

又

舍南種胡麻三日幸不雨晨起親按行已見青覆土窮
人如意少喜色漏眉宇兒童勿情偷造物不負汝

又

五月新麵成六月甘瓜熟作麵及良時火見金始伏懸

知桑落後醅面釀如粥再拜謝天公無功叨美祿

予家釀用

宛丘瓜

麵法

又

折蓮釀作醢采豆治作醬開歷揆日時汲井滌甑盎上

奉時祭須下給春耕餉咨爾後之人歲事不可曠

又

東山石上茶鷹爪初脫鞬雪落紅絲磴香動銀毫甌爽

如聞至言餘味終日留不知葉家白亦復有此不

又

逢人乞藥栽鬱鬱遂滿園玉芝來天姥黃精出雲門丹
茁雨後吐綠葉風中翻活人吾豈能要有此意存

又

我居大澤中一舟不可無短蓬挾兩槳疾若波中鳧來
往菰蘆村按行瓜芋區浮家亦可樂何必愛吾廬

又

軍興尚戎衣冠帶謝褒博禿巾與小裋顧影每懷忤及
今反士服始覺榮天爵出入阡陌間終身有餘樂

又

讀書乃一癖我亦不自知坐書窮至老更欲傳吾兒吾
兒復當傳百世以為期君看北山公太行尚可移

又

爵祿九鼎重名義一羽輕人見共如此吾道何由行湖
山有一士無人知姓名時時風月夕遙聞清嘯聲

逃暑小飲熟睡至暮

桑落香浮榭葉杯
甘瓜綠李亦佳哉
虛堂頓解汗揮雨
高枕俄成鼻殷雷
靜聽風聲生檻竹
徐看日影轉庭槐
晚涼更動扁舟興
北渚紅蕖已半開

又

槐影桐陰欲滿廊
綸巾羽扇自生涼
新筠玉瀝陳雙榼
平展風漪可一牀
馳騎遠分丹荔到
大盆寒浸碧瓜香
湖邊誰謂幽居陋
也愛迢迢夏日長

夜坐庭中達旦

老矣常嗟去日遒，病來更覺此生浮。
庭花無影月當午，簷樹有聲風報秋。
足倦獨行驚蹉跎，髮稀久坐怯飕飕。
雞號日出閒無事，又向清溪弄釣舟。

讀前輩詩文有感

我無前輩千鈞筆，造物爭功謝不能。
已分文章歸委靡，可憐意氣尚憑陵。
鷹旗廣殿晨排仗，鐵馬黃河夜踏冰。
此事要須推大手，蟬嘶分付與吳僧。

自嘲

天公大度一何奇養此無能老白癡宿疾閑愁俱掃盡
美餐甘寢更無時蛙鳴庭艸何曾問水半門扉亦不知
道似嬰兒猶有恨小軒風月獨哦詩

余讀元次山與瀼溪鄰里詩意甚愛之取其間四
句各作一首亦以示予幽居隣里

峯谷互回映

北起成孤峯東蟠作幽谷中有十餘家蘆藩映茆屋土

肥桑柘茂雨飽麻豆熟比鄰通有無井稅先期足煙中
語相會月下歌相續兒童不識字未必非汝福

張芸叟過鄭公

故莊詩曰兒童不識字耕稼鄭公莊

誰家無泉源

泉聲百步聞泉脉高下通潺湲亂雲外屈曲明月中八
月稻登場引之作機舂羨流灌蔬畦全家飽芥菰洗沐
及澣濯蚤莫靡不供斗水百憂寬悲哉杜陵翁

夾路多修竹

黃茆持覆屋溪石運作垣桑麻有餘地家家養龍孫春
雷初起蟄切玉供盤飧一朝解風籜靈黠蒼雲屯我來
倚拄杖恐是辟疆園千畝倘可致封君何足言

扁舟皆到門

千錢買輕舟不復從人借樵蘇晨入市鹽酪夕還舍豈
惟載春秧亦足穫秋稼有時醉村場老稚相枕藉常侵
落月行不畏惡風赫無為詫軒車此樂予豈暇

東山避暑用轆轤體

避暑穿林隨所之一奴每負胡牀隨望秋槁葉有先墮
未算赫日無餘暉輪囷離竒澗松古鈞輶格磔蠻禽悲
北巖竹間最慘慄清陂倚石真忘歸

喜雨

六月二十七日

去年禹廟歸梅梁今年黑虹見東方巫言當豐十二歲
父老相告喜欲狂插秧正得十日雨高下到處水滿塘
六月欲盡日杲杲造物已命摧驕陽夕雲如豚渡河漢
占書共謂雨至祥南山雷車載膏澤枕上忽送聲淋浪

猛思濁酒大作社更想紅稻初迎霜六十日白最先熟

食新且領晨炊香

六十日白稻名常以六月下旬熟

得故人書偶題

小築稽山下狂歌剡曲傍鄉隣共雞黍童穉學農桑白
首餘年促青編後日長此心誰復許三歎付書囊

喜雨歌

不雨珠不雨玉六月得雨真雨粟十年水旱食半菽民
伐桑柘賣黃犢去年小稔已食足今年當得厭酒肉斯

民醉飽定復哭幾人不見今年熟

老學菴井

老學菴北井六月寒如冰大旱不涸雨不增凜如人以
常德稱日濟千人不驕矜置而不汲渠自澄輾轡三丈
青絲繩對之以足涼肺膺使我終日卧曲肱顧謂此井
真良朋蕩除炎熇却塵垢宜有鬼神來護守嗚呼涇水
一石泥數斗正使逢時亦何有

長歌行

我無四目與兩口但在人間更事久死生元是開闔眼
禍福正如翻覆手消磨日月幾緬屐陶鑄唐虞一杯酒
既非狗馬要蓋帷那計風霜悴蒲柳竈突無煙今又慣
龜蟬與我成三友判知青史無功名只用忍飢垂不朽

七月二日夜賦

鄙人志趣在漁樵四十年来負聖朝本恥彈冠良易挂
未嘗刻印敢煩銷盈盈微月生江渚娟娟清笳下郡譙
衰病逢秋真一洗井牀桐葉已先飄

自述

二畝新蔬圃三間舊艸堂
病除身小健秋近夜微涼
薄酒時醒醉殘書半在亡
老懷常自笑無事忽悲傷

又

睡美不知旦氣衰先覺秋
有時浮小艇隨意宿滄洲
未恨名風漢惟求拜醉侯
更須多種竹搔首送悠悠


項羽

八尺將軍千里騅拔山扛鼎不妨奇
范增力盡無施處

路到烏江君自知

曹公

二袁劉表笑談無眼底英雄不足圖赤壁歸來應歎息
人間更有一周瑜



劍南詩藁卷三十九

缺 页

口如盆眼如電九十老人從小見曾攜一鶴過岳陽滿
城三日聞酒香

醉學究

聖師飲百觚儼然常齋莊弟子習禮餘兕觥躋公堂至
今遺風被洙泗諸生雅歌老儒醉衣冠簡朴未可輕安
知中無魯二生

次李長韻回寄

野人蓬戶冷如霜問訊今惟一季長舊好自均親骨肉

新知何怪薄心腸開書字字論疇昔遣使年年有故常
萬念知公掃除盡見哀底事獨難忘

溪上小酌

岸幘出籬門投竿俯溪瀨魚聚忽千百鳥鳴時一再新
涼社氛香亦有雉兔賣歡言洗杯酌又破止酒戒

齋中夜賦

高居終日掩齋扉幽事常多俗事稀露重叢篁時自瀉
風高脫葉有先飛秋衣漸製聞砧杵社肉初分謝蕨薇

却笑老身閒不得一燈明滅亂書圍

讀舊稟有感

我少則嗜書于道本無得譬如昌歆芟乃自性一癖老
來百事廢惟此尚自力豈惟絕慶弔乃至忘寢食吟哦
雜誦詠不覺日既夕文辭顧淺懦望古空太息世俗不
可解更為著金石收歛固已遲雖悔終何益君看老農
夫法亦傳后稷持此少自寬陶然送餘日

新秋

秋氣入清笳旗亭酒可賒長歌穿小市短帽插幽花溪
女留新蟹園公餉晚瓜誰知閒老子解作醉生涯

陳阜卿先生為兩浙轉運司考試官時秦丞相孫
以右文殿修撰來就試直欲首送阜卿得予文
卷擢置第一秦氏大怒予明年既顯黜先生亦
幾陷危機偶秦公薨遂已予晚歲料理故書得
先生手帖追感平昔作長句以識其事不知衰
涕之集也

冀北當年浩莫分斯人一顧每空羣國家科第與風漢
天下英雄惟使君後進何人知大老橫流無地寄斯文
自憐衰鈍辜真賞猶竊虛名海內聞

書喜

乞得身歸鏡水濱此生真作葛天民眼明身健何妨老
飯白茶甘不覺貧瓮酒又筍三斗熟園花時報一枝新
挂冠更作黃冠計多事常嫌賀季真

又

已向煙霞著脚深
世間萬事不關心
舊攜鴉觜供鉏藥
新典魚須用買琴
井上引藤初滿架
池南移竹漸成陰
話行不必須今日
五百年間有賞音

幽居

萬家水竹古山陰
揀得幽居愜素心
梁燕安巢知社近
井桐飄葉覺秋深
琴緣廢久塵常積
書為閒稀蠹漸侵
幸自杜門無一事
不須清夜感衣砧

雜興

病養精神過服藥貧知儉約勝營生
阜夔事業今何有
且與心君致太平

又

東家飯牛月未落西家打稻雞初鳴
老翁高枕葛幪裏
炊飯熟時猶鼾聲

又

算年常苦睡為崇好事新分安樂茶
更得小瓢吾事足

山家風味似僧家

曾召南提幹近
送安樂茶來

又

蛟鱷垂涎歷畏途如今歡喜去攜鋤一生患難休回首
足似元符曾上書

贈鷺

雪衣飛去莫匆匆小住灘前伴釣蓬禹廟蘭亭三十里
相逢多在算煙中

贈鵲

為梁星渚自何年毛羽摧傷不怨天知我齋餘常施食

翩然飛下北窗前

東堂睡起

置身事外息吾黥獨卧空堂一榻橫簷影漸移知日轉
樹梢微動覺風生每從山寺開經帙間就園公辨藥名
若論胸中淡無事八珍何得望藜羹

五鼓起坐待旦

睡覺初聞雞一鳴披衣危坐待窗明殘軀已向閒中老
癡夢猶尋熟處行南北迢迢悲往事古今莽莽歎浮生

伯倫一錘君休笑冢象初連亦已平

功名

少年妄意慕功名老眼看来一髮輕
金甲雖如朝邑尉羊裘終媿富春生
連娟落月依山盡寂寞寒潮蘸岸平
要識放翁新得意夢花多處釣舟橫

搔首

玩畫無餘易聞歌已盡詩古人不可作
此理孰能推白髮秋風裏青燈夜雨時
初心竟當負搔首歎吾衰

小雨釣歸

雨點鳴叢葦雲頭冒遠山
兒曹出籬望老子榜舟還潤
入園畦裏涼生窗戶間
秋陽方可畏徙倚一開顏

曉賦

八月江湖風露秋時聞
脫葉下梧楸離離斗柄西南指
爛爛天河今古流人語正謹過古埭
湖桑埭五鼓開
挽船聲喧甚角

聲三弄下譙樓百城已共豐年樂
一老猶懷卒歲憂

急雨

父老謂雲逆風則
必雨驗之信然

雲從西南興風自東北至老農占雨候速若屈伸臂亂
點俄打窗新涼已生袂經旬苦肺渴得此亦少慰呼兒
持故襦買酒具一醉薄言煮園蔬雉兔未可議

遣興

幾看人間歲月新釣船猶繫鏡湖濱曾穿高帝朝元仗
却作山陰版籍民留病三分嫌太健忍飢半日未全貧
早知晝繡能為崇翁子終身合負薪

又

湖海元為汗漫遊，誤思四嶺慢亭秋。
掃空薄祿始無媿，閉上衡門那得愁。
湯嫩雪濤翻茗椀，火溫香縷上衣篝。
牀頭亦有閒書卷，信手拈來倦即休。

又

掃盡衣塵喜不勝，村居終日醉騰騰。
閑投隣父祈神社，戲入羣兒鬪艸朋。
幽徑有風偏愛竹，虛堂無暑不憎蠅。
悠然又見江天晚，隔浦人家已上燈。

又

久矣微官絆此身
柴車歸老亦逢辰
阮咸臥摘孤風在
白墮閑傾一笑新
萬里馳驅曾遠戍
六朝涵養忝遺民
清閒即是桃源境
常笑淵明欲問津

讀林逋魏野二處士詩

君復仲先真隱淪
筆端亦自幹千鈞
閑中一句終難道
何況市朝名利人

紙墨皆漸竭戲作

官庫誰能餉陟釐
漢宮無復賜脩廩
不如掃盡書生事

閒伴兒童竹馬嬉

讀隱逸傳

終南處士入都門
少室山人補諫垣
畢竟只供千載笑
石封三品鶴乘軒

泛舟至東村

野水如天遠漁舟似葉輕
颼颼風漸冷
淡淡月初生
沙際樵蘇路
籬間語笑聲
還家已薄暮
燈火照柴荆

自詒

金史口占
卷四十一
健忘閒何害貪眠老正宜
本心惟泥酒餘習略存詩
未廢春農業猶堪幼學師
微官何所戀請老五年遲

野興

荷鋤通北澗腰斧上東峯
秋水清見底曉雲深幾重
鼙鼙傳社鼓渺渺度樓鐘
歸覓村橋路詩情抵酒濃

讀書

平生愛客如愛書力雖不逮
意有餘門前車馬久掃迹
老病又與黃卷疎人情冷煖
可無問手不觸書吾自恨

今年入秋風雨頻燈火得涼初可近年過七十眼尚明
天公成就老書生舊業雖衰猶不墜夜窗父子讀書聲
客有見過者既去喟然有作

鬢毛俱白盡事不補秋毫去死今無幾歸耕何足高已
如陶止酒徒勸屈鋪糟惟有滄溟去揚帆觀雪濤

又

永日安耕釣餘年迫耄期研朱點周易飲酒和陶詩帶
箭歸飛鶴搯牀不瞑龜此生君看取死是出門時

秋陰

淡日披朝霧輕雲結暮陰
菰蒲溪路暗松竹草堂深
妙墨雙鉤帖奇聲百衲琴
古人端未遠一笑會吾心

八月九日晚賦

薄晚悠然下草堂綸巾鶴氅弄秋光
風經樹杪聲初緊月入門扉影正方
一世不知誰後死四時可愛是新涼
從今覓醉其當勉酒似鷺兒破殼黃

燕坐

赫日曛曛湧海門黃流混混沂河源功成一日書仙籍
鍊骨成金不足言

村飲

不來東舍即西家野老逢迎一笑譁試說算年如意事
細傾村釀聽私蛙

又

無念無營飽即嬉老翁真箇似嬰兒昏鍾未動先酣枕
日上三竿是起時

又

買來新兔不論錢
釣得鮮鱗細柳穿
野店渾頭更醇釀
一杯放手已醺然

又

淡煙孤榜繫村橋
壘壘沙痕印落潮
最是今年秋好處
踏泥沽酒不辭遙

秋雨益涼寫興

秋氣蕭蕭暑已歸
晚雲更送雨霏微
牀收珍簟敷菅席

筍疊纖絺換熟衣
遣醉縱橫馳筆陣
乘閑談笑解棋圍
出門未免流年歎
又見湖邊木葉飛

薪米偶不繼戲書

仕宦不諧農失業
敗屋蕭蕭書數篋
藜羹不糝未足嗟
爨竈無薪掃枯葉
丈夫窮空自其分
餓死吾肩未嘗脅
世間大有乞墦人
放翁笑汝驕妻妾

牧牛兒

溪深不須憂吳牛
自能浮童兒踏牛背
安穩如乘舟寒

雨山陂遠參差烟樹晚聞笛翁出迎兒歸牛入圈

與兒子至東村遇父老共語因作小詩

桑竹穿村巷衡茅隔土垣海氛成物象秋氣肅川原
豆芋行將熟雞豚亦已繁豐凶歲所有農事更深論

微雨午寢夢憩道傍驛舍若在秦蜀間慨然有賦

吳中秋晚雨冥冥自笑閑愁又爾馨身世已歸南北陌
夢魂猶寄短長亭濁醪可釀樽餘綠明鏡無情鬢失青
賴有釣船堪送老一汀鷗鷺共忘形

晨起對鏡

雙鬢成絲高頰顴曉窗臨鏡意茫然朱顏豈是一朝去
暗鑠潛消五十年

村思

揣分新辭祿扶衰又度秋已將窮博健更賴學忘憂船
護煙陂鴨欄歸草徑牛作勞何以慰茅店問新篳

秋夜

倦叟投牀早昏燈落燼頻鵲翻驚缺月犬吠逐行人未

金史四庫全書
卷四十一
喪詩書業猶存老病身菊花行可醉作意挿烏巾

醉中書懷

既老心愈空新涼體差健登山每嗔扶對案亦強飯平生百事嬾惟酒不待勸迨此桑落時一醉適我願羸然雲水身本非朱紫愔少猶恥枉尺老敢欺方寸但令死瞑目餘事何足論不見鹿門翁全家事潛遯

次韻鄭盱眙見寄并簡其甥劉君

衣上空嗟京洛塵故交半作白頭新衆中初得見吾子

東觀已疑無若人仗馬極知非久斥沙鷗要是孰能馴
兩章英妙同時到趙壹囊中却未貧

書齋壁

平生憂患苦縈纏菱刺磨成芡實園

俗謂因折多者謂菱角磨作雞頭

天下不知誰竟是古來惟有醉差賢過堂未悟鐘將覺
晚桂寧知壁偶全自笑為農行沒世尚如驚雁落空弦

一老

太平一老醉騰騰南陌東阡喜不勝民力農桑家自足

士崇名節道方興騎鯨仙去時猶遠射虎歸來氣頗增
莫道幽棲交舊絕月中亦有打門僧

戲用方外語示客

紅粟青錢一掃空
筵籬行賣學龐翁
身居本地風光裏
愁擲它方世界中
刺欲劇談明不二
誰能太息賞無同
踞牀一唱君聞否
三日猶應覺耳聾

秋晚

西山破曉兩眉青
南浦無風一鏡平
食盡不容添鶴口

身閑且免負鷗盟
霜前艸樹已無色
雨到菰蒲先有聲
只怪勝遊頻入夢
今朝蜀客話青城

故人范中立巨山
自青城來見訪

又

辭祿始知貧有味
杜門不覺老相催
寒鴉已占雁前到
黃菊猶須霜後開
團扇塵埃高挂壁
短檠書史亂成堆
羸軀自笑癡頑甚
撐拄新寒又一回

又

世事無窮似奕棋
不如常采故山芝
蕭蕭雞犬三家聚

莽莽風煙十里陂幸有濁醪從客醉常憂黠鬼笑人癡
清秋樂處君知否庭下幽花漸可移

次金溪宗人伯政見寄韻

道義流聞意已傾豈知晚歲託齊盟六經日月未嘗蝕
千載源流終自明汝水家家書有種吾宗世世士知名
讀君長句還增氣俗耳那聞韶韻聲

新寒

碧蝶飛飛過短籬山薑石竹有殘枝誰知老子閒眠處

恰是新寒細雨時

又

安石榴房初小坼南天竺子亦微丹新寒漠漠偏欺老

睡起無風怯倚欄

南燭草本俗謂之南天竺李端叔取以名僧軒蓋用俗語也

村隣會飲

陸子白首安耕桑樂事遽數烏能詳長羅家家雪作麵
畫楫處處青分秧迎荻船歸潮入浦祈蠶會散月滿廊
有時鄰曲苦招喚茅簷掃地羅壺觴堆盤珍膾似河鯉

入鼎大臠勝胡羊披緜黃雀麴糵美斫雪紫蟹椒橙香
老人飽食可無患摩挲酒瓮與飯囊兒孫扶持遞相送
笑語無間歌聲長人間哀樂不可常掠剝有鬼在汝傍
常憂水旱虞螟蝗力行孝悌招豐穰

試筆

烹葵飯豆飽還休弄筆翻書歲又秋靈府湛然如止水
擬將何地著閒愁

又

紅絲玉斗紫毫銍歲晚相從味更長不似樂天歸老日
柳枝駱馬兩堪傷

孤村

老寄孤村裏悠然卧曲肱筭貧先放鶴嫌閑併疎僧古
戍高秋笛寒窗半夜燈平生羞詭遇多獲豈吾能

絕祿以來衣食愈不繼小兒力圖之殊未有涯予
謂不若痛節用爾示以此詩

處世吾傷拙營生汝亦疎如謀道邊舍似信枕中書甕

牖居疑泰藜羹食敢餘晏嬰元學墨勿負此心初

予宿疾多已失去獨氣痛時作賦詩自寬

疾久難全去扶持度歲年垣墻完罅隙七筋禁芳鮮漸
減觀書課常儲買藥錢鄉人多不識誰與問沉緜

秋懷十首末章稍自振起亦古義也

皇天本無心萬物各有時飛鴻何預人南翔每如期仰
看霜露墜俯歎艸木衰英英籬下菊秀色獨滿枝豈無
一樽酒相與斟酌之耄老天所佚行歌復何疑

又

暑退財幾時忽已迫霜露西風一何厲落葉紛滿路老
翁衰可笑日夜念墮戶衣裘先關懷膏火亦當具酒尤
不可緩傾聽糟牀注供盤柿栗耳何敢議雉兔

又

雨滴大梧葉風轉孤蓬窠秋色固悽愴二物感人多日
月行黃道倏過如飛梭大計百年間貴賤俱銷磨東家
及西舍更代哭與歌若無杯中物如此搖落何

又

身如行脚僧放包即為家家如道邊店蕭然寄天涯居
室如小舟風扉艣謳啞坐傍陳琴書庭下栽雜花儉陋
雖可笑在我則已奢何以善吾生念念思無邪

又

遇酒幸一醉遇飯幸一飽或遇空無時豈復有他巧鄉
鄰哀其窮叩戶餽糜麩欣然出舍傍耘韭青落爪飢羸
曾未起吟諷已稍稍袖手北窗前枯腸困搜攪

又

秋高天薄寒夾衣已出笥團團素紈扇時至自當棄明年機中練與我亦何異宮妾感物悲此豈丈夫事吾曹一出門所遇皆有義夷齊死千年高風邈難嗣

又

辟塵當以屏濯纓當以水龜堂一炷香世念去如洗人生天地間太倉一稊米哀哉不自悟役役以至死孰能從我遊趺坐燔柏子夜半清磬聲悠然從定起

又

改朔甫再宿月見西南隅纖纖一銀鈎挂空疑有無我
行青楓岸遠水浮雙鳬新寒入短衣感此風霜初頗欲
呼小艇東村行芋區衣薄且言歸煙火望吾廬

又

短蓑榜輕舟時過野僧舍長衫挂數珠亦入法華社平
生無揀擇生死均早夜餘年猶幾何久已付造化常嫌
樂天佞却肯退之罵君看佛骨表自是無生話

又

我昔聞關中水深土平曠涇渭貫其間沃壤誰與抗桑
麻鬱千里黍稷高一丈潼華臨黃河古出名將相淪陷
七十年北首增慘愴猶期垂老眼一覩天下壯

九月七日子坦子聿俱出斂租穀雞初鳴而行甲

夜始歸勞以此詩

仲秋穀方登螟生忽告飢難難冀一飽俯仰事已非貸
糧助耕耘客主更相依一旦忽如此欲語涕屢揮共斂

螟之餘存者牛毛稀吾兒廢書出辛苦幸庶幾夜半聞
具舟憐汝露溼衣既夕不能食念汝戴星歸手持一杯
酒老意不可違秫瘦酒味薄食少雞不肥頗聞吳中熟
多稼徹王畿亦欲就飽處無羽能奮飛官富哀我民榜
笞方甚威渠亦豈得已撫事增歎歎

醉題埭西酒家

陣陣新寒入布裘偶乘小醉得閑遊丹楓落日野橋晚
斷雁溼雲江路秋馬得一鳴何恨斥金經百鍊豈容柔

不知千載塵埃裏更有吾曹強項不

又

桑麻蒙翳不通鄰耽酒頽然一老民
遣客方眠那是醉有衣可典未為貧
曬翎斜日鷗來熟印跡平沙雁到新
君看此間何境界癡人猶說吐車茵

秋晚

庭草猶殘綠溪楓已半丹誰知此翁健
又見一年寒幻境槐安夢危機竹節灘
如今渾過盡摩腹且加餐

省事

省事漸捐書甘貧學藝蔬心安閒夢少病去俗醫疎兀
爾遊方外超然到物初此身猶是幻況復愛吾廬

晨起頗寒飲少酒作州數幅

衣食無多悉自營今年真箇是歸耕屏居大澤羣鷺息
乍得清寒百體輕橋北潦收波淺碧埭西霜近葉微顛
一杯弄筆元無法自愛龍蛇入卷聲

往事

海內橫流日吾猶及建炎衆醫雖共視久疾固難砭黠
寇方觀釁行宮未解嚴時平逾五紀話此涕常霑

步至東莊

澤國寒雖晚霜天已迫冬
薺花雪無際稻米玉新春
身已風中葉人方飯後鐘
兒能哀老子努力事春農

秋思

門巷蕭條秋色深
黃花始欲慰孤斟
久貧自笑不妨樂
過足固知非所欽
琴調已忘還漸省
詩聯未穩更長吟

吾兒西上無多日安得相從老故林

時子虞將
調官臨安

又

日落江城聞擣衣長空杳杳雁南飛
桑枝空後醅初熟豆莢成時兔正肥
徂歲背人常冉冉老懷感物倍依依
平生許國今何有且擬梁鴻賦五噫

讀退之人不知古今馬牛而襟裾之句有感

書生獨占世間癡過計私憂無已時
知盡古今成底事空將血淚向人垂

病愈看鏡

鏡中稍復舊朱顏一笑衰翁乃爾頑三百瓮壺消未盡

不知更著幾年還

舊傳貧士死見陰吏為言當還魂有三百瓮壺祿料未盡

讀韓致光詩集

渺莽江湖萬里秋玉峯老子弄孤舟猶勝宿直金鑾夜

凜凜常懷潑酢憂

逆旅書壁

驢鞍懸酒榼僮背負衣囊但說市朝變不知岐路長下

程先施藥拂榻靜焚香明旦又西去河橋秋葉黃

又

騎驢萬里行歲一過秦城下杜貫春酒新豐聞曉鶯綠
槐新巷陌白骨幾公卿欲覓曲江水連雲禾黍生

初寒老身頗健戲書

一身百病老難支病減身輕偶此時窗暖不妨聊假寐
囊空久已罷招醫山爐嚨絕香生岫鑿研坡陀墨滿池
箇裏生涯君莫厭癡人至死不曾知

又

過雁聲悲落葉稠孤村景物更禁秋窮諳客路風塵惡
老判人間歲月遒酒號賢人真古語疾為豎子豈吾憂
山房幸有初寒備且傍篝爐擁褐裘

子龍求煙雨軒詩口占絕句

烏桕迎霜已半丹哦詩終日合憑欄霜高木落應尤好
長挂西窗更怕寒

又



規模正似釣魚菴把酒纔容客二三若比東偏參倚室

此中猶自覺耽耽

參倚蓋子聿書室名也

劔南詩藁卷四十

欽定四庫全書

劔南詩藁卷四十一

宋 陸游 撰

居室甚隘而藏書頗富率終日不出戶

掩關小室動經旬蠹簡如山伴此身百億須彌藏粒芥
大千經卷寓微塵危機已過猶驚顧惡夢初回一欠伸
此段神通君會否聽風聽雪待新春

又

金步曰八卷四十一
椰子微軀有百窮平生風際轉枯蓬豈知蟬腹龜腸後
更寄蜂房螳穴中學儉久判羹不糝憚煩惟欲寐無聰
積書充棟元無用聊復吟哦畲候蟲

無酒歎

不用塞黃河不用出周鼎但願酒滿家日夜醉不醒不
用冠如箕不用印如斗但願身強健朝暮常飲酒造物
不少恕虐戲逐段新坐令古銅槥經月常生塵平生得
酒狂無敵百幅淋漓風雨疾造物欲以醒困之此老醒

狂君未知

讀書

古人已死書獨存吾曹賴書見古人後之視今猶視古
吾書未泯要有取賈生痛哭漢文時至今讀之有餘悲
魏徵嘻笑封德彝生亦豈責絳灌知窮秋風雨卧孤館
萬世悠悠百年短垂死成功亦未晚安知無人歎微管

醉賦

霜楓照茅屋露菊插紗巾今古無窮事江湖未死身直

令依馬磨終勝拜車塵我亦輕餘子君當恕醉人

掩扉

久卧空山獨掩扉
趺疎不恨世相違
新霜巷陌烏烏樂
小雨園畦菘芥肥
驥病極知當伏櫪
鷗閒誰與共忘機
一編蠹簡從吾好
又見西窗挂夕暉

六經

六經聖所傳
百代尊元龜
諄諄布方冊
一字不汝欺
抱書入家塾
自汝兒童時
老乃幸不驢
愚哉死何悲

又

秦人燔六經非與經為仇方其勇決時亦為子孫謀歟
金鑄巨人豈復畏鉏耰千載惡名在尚與黃河流

舟中作

沙路時晴雨漁舟日往來村村皆畫本處處有詩材炊
黍孤煙晚呼牛一笛哀終身看不厭岸幘興悠哉

秋晚

門巷清如水情懷淡似秋詩吟唐近體談慕晉高流託

命須長鑣浮家只小舟江南煙雨岸何處不堪留

又

木落寺樓出江平沙渚生牛羊下殘照鼓角動高城寒
至衣猶質憂多夢自驚干戈方鬪穴河渭幾時清

西窗獨酌

却掃衡門歲月深殘骸況復病交侵平生所學為何事
後世有人知此心水落枯萍黏破塊霜高丹葉照橫林
一樽濁酒西窗下安得無功與共斟

冬初薄霜病軀益健欣然有賦

古服追隨野老歡
豎裁布褐縮縫冠
霜清頓洗肺肝熱
木落更知山澤寬
斗酒敢言嫌魯薄
杯羹聊得學吳酸
一貧自是書生分
忍媿看人却似難

一錢

萬事紛紛不足論
滿庭枯艸閉柴門
一錢留得終羞澀
持買餽餽引福孫

燈下讀書戲作

吾生如蠹魚亦復類熠熠一生守斷簡微火寒自照區
區心所樂那顧世間笑閉門謝俗子與汝不同調

遊近山

羸病知難賦遠遊尚尋好景送悠悠亂山孤店雁聲晚
一馬二童溪路秋掃壁有僧求醉墨倚樓無客話清愁
殘年敢望常強健到處臨歸為小留

示兒子

祿食無功我自知汝曹何以報明時為農為士亦奚異

事國事親惟不欺道在六經寧有盡躬耕百畝可無飢
最親切處今相付熟讀周公七月詩

寄溧陽周丞文璞周寄詩卷殊可喜

滿握珠璣何自來晴窗初喜折書開信哉天下有奇作
久矣名家多異才隔閏經年如許進超騰它日若為陪
山陰道上霜天好安得相從賦早梅

旅思

支遁山前看月明葛洪井上聽松聲廢亭草滿青驄健

野店燈殘寶劍鳴萬事竟當歸定論寸心那得媿平生
悠然酌罷無人語寄意孤桐一再行

東村步歸

野渡霜風冷茆簷夕照明催科醉亭長聚學老書生山
果紛丹漆村醪任濁清路回家忽近柳外小橋橫

又

風陣鴉翻黑霜林葉半丹筋骸欣小健裘褐戒初寒代
步雞栖足充飢鶴料寬平生自如許況已挂吾冠

觀方外書

司馬遺書有坐忘顓翁止觀略相當龜堂閉戶常終日
時得相從一炷香

午睡初起

曲腰桑上午雞鳴喔喔還如報五更睡起展書摩病眼
油窗喜對夕陽明

又

舍中未報壓新醅閑弄流塵榼葉杯得醉固佳醒亦好

了無一事到靈臺

算秋遣興

改盡朱顏白盡頭
杜門亦復弊貂裘
斷鴻影外玉關月
病驥嘶中青海秋
孤坐向空書咄咄
閑吟隨處送悠悠
如虹壯氣終難豁
安得雲濤萬里舟

又

平生南地慣羈遊
放浪常同不繫舟
鼉作夜風經沌口
鶴鳴秋雨宿杭頭
方傾意氣輕秦俠
俄困悲傷類楚囚

買屋數間聊作戲豈知真用作菟裘

種蔬

老翁老去尚何言除却翻書即灌園處處移蔬乘小雨
時時拾礫繞頽垣江鄉地暖根常茂旱歲蟲生葉未繁
四壁愈空冬祭近更催穉子牧雞豚

起晚戲作

睡到僧廊響木魚莊周蝴蝶兩蘧蘧數聲林下華亭鶴
一卷牀頭笠澤書雲子甌香炊熟後露芽甌淺點嘗初

若論身逸心無事臺省諸公恐不如

老歎

八十未滿七十餘山巔水涯一丈夫長鳴未免似野鶴
生意欲盡如枯株臨安宮闕經營初銀鞍日日醉西湖
不須細數舊酒徒當時兒童今亦無

新治暖室

小堂穩暖紙窗明低幌圍爐亦已成日閱藏經忘歲月
時臨閣帖雜真行詩才退後愁酣戰酒量衰來喜細傾

從此過冬那復事夜深時聽雪來聲

暖閣

裘輭勝狐白爐溫等鴿青

宮中供爐炭用胡麻文鴿青

紙屏山字樣

布被隸書銘養目簾稀卷留香戶每局日晡濃睡起盥

濯誦黃庭

自詠

朋舊凋零盡乾坤偶脫遺食新心竊喜話舊語多悲泥
醉醒常少貪眠起獨遲閉門誰共處枕藉樂天詩

王元之自

言在商州讀老莊
外枕藉白樂天詩

夜坐

白首仍多病青燈獨掩扉
雲低聞雁過雨急待兒歸

初冬有感

衰髮蕭蕭滿鏡絲情懷非復似平時
風霜十月流年感

礎杵三更游子悲閩嶠故人消息惡
傳聞方伯暮病卒蜀江遺

老素書遲
張季長居唐安歲常通書一簞豆飯休嫌薄
賦分羈窮合

自知

又

我冠本願致唐虞白首那知墮腐儒碌碌不成千載事
駸駸又見一年徂無僧解輟齋厨米有吏頻徵瘦地租
要信此翁頑到底只持一笑了窮途

題酒家壁

智若禹行水道如丁解牛遽遽幾春夢泛泛一虛舟事
定憂何益狂來醉始休青帘誇酒美且復共登樓

冬初出遊

風聲如雨曉颼颼萬葉丹楓滿瓦溝西望牛頭三十里
一枝柔艣作閒遊

又

蹇驢渺渺涉煙津十里山村發興新青旂酒家黃葉寺
相逢俱是畫中人

早飯後戲作

湯餅滿盃肥羖香更留餘地著黃梁解衣摩腹西窗下
莫怪人嘲作飯囊

又

髯鬚主簿方用事冰壺先生來解圍蠻童取火炷香椀
不讀南華誰與歸

擬古

牛跡可使圜羊角可使直惟使剛者柔造物不可得世
方貴輒熟剛實不可為為剛死道傍已矣何所悲

又

君看一鈎絲能得幾日絡君思幾州鐵打此一大錯目

前豈不快後悔將奈何我非通神明比汝更事多

又

寧忍千日饑野葛不可烹寧枉百里途捷徑不可行自
古風俗壞善士亦淪胥橘柚禹包貢後世稱木奴

又

坐卧北窗下百事廢不治脫粟與大布衣食裁自支溫
飽豈不欲違道予心悲地下見先人所冀尚有辭

東村

野人知我出門稀
男輟鉏耰女下機
掘得茈菇炊正熟
一杯苦勸護寒歸

又

野人喜我偶閒遊
取酒怱怱勸小留
舍後攜籃挑菜甲

門前喚擔買梨頭

村人謂小梨為梨頭

倚闌

滿庭晴日破朝寒
粥罷披裘小倚闌
殘菊抱叢香欲盡
一枝南燭獨如丹

霜寒不能出戶偶書

垂老仍多病濃霜得快晴猶能按菊醉

今年菊晚十月末猶有花但

負探梅行篝火烘裘暖油窗潑眼明小兒殊可喜和我

讀書聲

冬晴與子垣子聿遊湖上

湖邊細靄弄霏微柳下人家晝掩扉乘暖冬耕無遠近

小舟日晚載犁歸

又

村南村北紡車鳴打豆家家趣快晴過盡水邊牛跡路
嶺頭猿鳥伴閒行

又

道邊白水如牛渚知是山泉一脉來會挈風爐并石鼎
桃枝竹裏試茶杯

又

海山山下百餘家垣屋參差一帶斜我欲往尋疑路斷
試沿流水覓桃花

又

老僧八十無童子禮佛看經總不能雙手了又出迎客
自稱六十六年僧

又

一榼無時可醉吟一藤隨處得幽尋先須挽取銀河水
淨洗人間塵霧心

夢蜀

夢飲成都好事家新粧執樂雁行斜賴肩郫縣千筒酒

照眼彭州百馱花醉帽傾歌未闕罰觥潏潏笑方譁
霜鐘喚覺晨窗白自怪無端一念差

歲晚

無窮世事浩難量歲晚沉綿卧艸堂短褐坼圖移曲折
故書經蠹失偏傍賣刀擬買春耕犢挾策曾亡舊牧羊
點檢生涯還自笑菜畦殘葉帶新霜

吳中冬
蔬常茂

又

扶藤據几久支離敢料駸駸迫耄期面槁自丹天所借

齒搖復住力何施
花前鯨吸猶堪酒
窗底蟬嘶未廢詩
浮世極知誰不死
比君終技幾年遲

讀老子

道德五千言
巍巍衆妙門
管窺那見豹
指染僅嘗鼃
正爾分章句
誰歟達本源
蜀莊猶不死
過我得深論

世傳莊君

乎不死時在人
間猶讀老子

貧病

窮愁病思兩茫茫
衰髮元知合變霜
酒要解醒猶有策

食求祝噎更無方凋零坐上親朋少寂寞人間歲月長
默計有時還自幸幼安垂老始歸鄉

洪雅葛仙硯

探齋中
物作題

異硯出漢嘉溫潤蒼玉質因形作獸背得墨如點漆才

高德亦全終月不更筆蠶溪大沱輩

皆蜀硯之
得名者

烏敢相

甲乙從我歸吳中略計將萬日摩拂不去手有若琴在

膝名晦知者稀體重盜計室惟當州太玄不污管商術

冬日讀白集愛其貧堅志士節病長高人情之句

作古風

君子亦有慕不慕要路津君子亦有恥不恥賤與貧風
俗未唐虞詩書非一秦展轉不能瞑卧聽雞唱晨

又

天下不難一孰能凝使堅自古功已成或散如飛煙惟
唐用房魏規模三百年至今河潼路過者猶泣然

又

漢禍始外戚唐亂基宦寺小人計已私頗復指他事公

卿恬駭機關河入危涕艸茅豈無人死抱經世志

又

成童入鄉校所願為善士富貴本邂逅不遇亦已矣生
輕名義重固守當以死堂堂七尺軀勿使污青史

又

勁風東北來茆屋吹欲裂出門有奇觀湖上千峯雪日
高炊未具歲晚衣百結士豈無一長所要全大節

又

吾常慕昔人石介與王令挑燈讀其文奮起失衰病吾
徒宗六經崇雅必放鄭人衆何足云少忍待天定

又

郊居四十年艸木日夜長喬松已偃蓋穉松出蓁莽儒
生學仁義敢廢自培養鬱鬱棟梁姿拔地當百丈

又

仕如柳柳州牋奏典儀曹君恩篤始終賜骸老東臯歷
觀親黨間如我亦已遭世世當歛退里門不須高

又

鏡湖有隱者莫知何許人出與風月遊居與猿鳥鄰似
生結繩代或是葛天民我欲往從之煙波浩無津

又

卜日家祭竈牲肥酒香清分胙雖薄少要是鄰里情衆
起壽主人一觥潏潏傾氣衰易成醉睡覺窗已明

十一月四日夜半枕上口占

小室愔愔夜向分幽人殘睡帶殘醺簷間雨滴愁偏覺

卷四十一
枕畔橙香夢亦聞驚雁數聲投野澤悲筇三疊上霜雲
年來萬事俱拋盡自笑詩中尚策勲

齋中弄筆偶書示子聿

左右琴樽靜不譁放翁新作老生涯焚香細讀斜川集
候火親烹顧渚茶書為半酣差近古詩雖苦思未名家
一窗殘日呼愁起裊裊江城咽暮笳

飢寒吟

夜寒每達旦懷抱安得寬朝飢或過午忍此良亦難飢

寒誠吾憂憂有甚飢寒彈琴不終曲推去發永歎大兒
破綠襦三歲待一官小兒學耕稼飯牛歌夜闌老翁垂
八十捫壁行蹢躅傷觀勿嘲笑窮死心所安

病愈小健戲作

路入江村跨蹇驢鞍前分挂兩囊書興來到處沽新酒
不為閒愁要破除

又

入市歸村不跨驢蠅頭細字夜抄書身安自勝閒官職

金少隱先生集
卷四十一
不是虛名暗折除

祭竈與鄰曲散福

已幸懸車示子孫
正須祭竈請比鄰
歲時風俗相傳久
賓主歡娛一笑新
雪鬢坐深知敬老
瓦盆酌滿不差貧
問君此夕茅簷底
何似原頭樂社神

湖水愈縮戲作

瓜龍從來幾郡平
鏡湖復有一玄英
今秋雨少煙波窄
堪笑沙鷗也敗盟

夜坐

夜永霜濃睡不成
團圞兒女話無生
金蓮妄想消除盡
一椀松肪徹曉明

夢中作遊山絕句

霜風吹帽江村路
小蹇迢迢委轡行
忽到雲山幽絕處
穿林啼鳥不知名

又

寺樓已斷算鐘聲
照佛琉璃一點明
不道溪深待船久

老僧驚怪太遲生

大姪挽辭

前知鬱林州
博白縣絳

束髮已青袍終身州縣勞一官常骯髒萬里忽君蒿竟

負昂霄志空傳擲印豪

君在博白與郡爭辨
職事袖印還之而去

兩疎心不

遂遺恨寄滔滔

書幸

富貴不可為禍機發須臾貧賤不可為飢寒死路衢我
亦貧賤者死期幸少紓春雨兩耕犢西疇破煙蕪秋風

一釣舟南浦宿菰蒲辛勤異退之亦復有屋廬堂北鑿
明窗可以陳琴書文章不傳世自適亦有餘

又

我身匪兕虎豈是曠野物生非洪水時胡為在巢窟向
來三入朝薄命不黔突未嘗職許史況敢交平勃滄波
渺黏天遠逐輕鷗沒今年君恩厚幸許賜骸骨既逃申
公鉗又異卞和刖放懷歌鳴鳴寧暇書咄咄

退居

溪煙漠漠奕棊軒
笕水潺潺種藥園
醫為疾平新掃跡
客知睡美罕敲門
談餘白拂懸牀角
飲散空樽卧壁根
賜帛更蒙優老詔
此生何以報君恩

比有詔書賜致仕官羊酒粟帛丁寧

至甚

北望感懷

滎河溫洛帝王州
七十年来禾黍秋
大事竟為朋黨誤
遺民空歎歲時遒
乾坤恨入新豐酒
霜露寒侵李子裘
食粟本同天下責
孤臣敢獨廢深憂

白髮

蕭蕭白髮濯滄浪，剡曲西南一草堂。
飲水讀書貧亦樂，杜門養病老何傷。
已成五畝扶犁叟，誰記三朝執戟郎。
正似籬邊數枝菊，歲殘猶復耐冰霜。

老歎

事與年俱往，心於世轉疎。
曼膚銷欲盡，鬢髮變無餘。
野店通賒酒，隣翁伴荷鋤。
尚嗟餘習在，夢課吏鈔書。

作竹籬成因把酒其間戲題四十字

今日偶暄暖卧聞林鳥呼雖思大白飲未免小蒼扶柳
色動籬外梅花來座隅夕陽紅滿野更復倒殘壺

新養白雞毛羽如玉殊可愛

赤幘戔戔玉羽明籬間新織竹籠成老人從此知昏曉
不用元戎報五更

新籬

新籬三面北通門藤架陰中細路分天宇淡青成卵色
水波微皺作靴紋參差村舍穿林出縹渺漁歌隔浦聞

忽覺楚鄉來眼底欲題幽句弔湘君

龜堂雜興

朝來地碓玉新春雞蹠豚肩異味重便腹摩挲更無事
老人又過一年冬

又

曳杖東岡信步行夕陽偏向竹間明丹楓吹盡鴉聲樂
又得霜天一日晴

又

閩溪紙被輒於綿黎峒花紬暖勝擅一夜山中三尺雪
未妨老子日高眠

又

三分帶苦檜花蜜一點無塵柏子香鼻觀舌根俱得道
悠悠誰識老龜堂

又

方石斛栽香百合小盆山養水黃楊老翁不是童兒態
無奈菴中白日長

又

少年身寄市朝中
俗論紛紛聒耳聾
清絕寧知有今日
高眠終夜聽松風

又

二三隣曲偶相尋
小醉悠然卧竹陰
醒後自看還自笑
溪雲猶未是無心

又

蒲團安坐地爐溫
無位真人出面門
世上不知何歲月

斷鐘殘角送黃昏

又

道妙從來亦麤聞
閉門方用十年勤
筆端小技深知悔
舊橐如山欲盡焚

又

散樸澆淳萬事新
腐儒空有涕沾巾
唐虞不是終難致
自欠臯夔一輩人

劔南詩橐卷四十一